

# Powšitkowne WOZJEWJENJA

njedźelu, 25. nowembra 2018

## Młodostni na Chrysta Krala do Chrósćic

Nyšpor wosebje za wšitkich młodostnych budže na swjedženju Chrysta Krala, njedźelu, 25. nowembra, w 14.00 hodź., w Chrósćanskej cyrkwi. Po nim su młodostni na faru k zhromadnej swačinje a na přednošk wo Awstralskej přeprašeni.

## Zetkanje samostejacych w Smochćicach

Samostejacy ze serbskich wosadow su na swoje přichodne zetkanje srjedu, 12. decembra, w 14 hodź. do Domu biskopa Bena w Smochćicach přeprašeni. Zajimcy njech so prošu hač do srjedy, 5. decembra, w redakciji Katolskeho Posoła přizjewja, telefonowe čisło (0 35 91) 55 02 12. Štóž chce wotewzaty być, njech to prošu zdželi. Wšitcy njech sej Wosadnik sobu přinjesu. Tež druzy su witani.

## Paslenje adwentneje pychi

Dekanatne dušepastyrstwo džěci a młodžiny přeprašuje na paslenje adwentneje pychi do Don Boskowneho domu we Worklecach pjatk, 30. nowembra, wot 17 hač do 21 hodź. Witani su młodostni, maćerje a dalši zajimcy. Kóždy ma swój předžěłany material zapłaćić.

## Swjedženje Marije bjezhřešneho podjeća w Róžeńce

Na wysokim swjedženju Marije bjezhřešneho podjeća sobotu, 8. decembra, njebudže Boža mša w hnadownej cyrkwi w Róžeńce kaž hewak rano we wosmich, ale swjedženja dla w 9.00 hodź. Přizamknje so modlenje před Najswjećišim – wot 10.30 hodź. do 11.00 hodź. za młode swójby z džěćimi a wot 11.00 hodź. do 12.00 hodź. za wšitkich. W 12.00 hodź. je zakónčacy nyšpor z eucharistiskim požohnowanjom. Wšitcy su wutrobnje přeprašeni.

## Kulturna zyma w putniskej hospodze

W Chrósćanskej putniskej hospodze wotměje so w přichodnych měsacach zaso tak mjenowana Kulturna zyma. Sobotu, 1. decembra, w 19.45 hodź. wotewru tam wustajeńcu Gerata Šmelinka ze Šunowa pod titlom „Historiske serbske pohladnicy“. Link na wšitke zarjadowanja je na internetowej stronje [www.posol.de](http://www.posol.de) podaty.

## Poswjećenje swjateho křiža w Praze

Nyšpor z poswjećenjom swjateho křiža budže sobotu, 1. decembra, w 11 hodź. w Praskim Serbskim seminarje. Radworski chór Meja jón hudźbnje wuhotuje.

## Duchowna hudźba k přěnjemu adwentej

W Budyskej cyrkwi Našeje lubeje knjenje zaklinči njedźelu, 2. decembra, we 18.00 hodź. duchowna hudźba z akordeonom. Pod heslom „Puće do adwenta“ zahrajetaj wuměłcaj skupiny Akordeon Virtuosi na přikład twórby Vivaldija, Bacha, Solotariova a Piazzolle.

## Adwentne wiki w klóštrje

Adwentne wiki w klóštrje wotměja so pjatk a sobotu, 7. a 8. decembra, stajnje wot 10.30. do 18 hodź. Na nich změja mjez druhim někotrežkuli chłóšćenki a wudžělki z rukow rjadnicow kaž tež z džěłarnje zbrašenych. Nimo toho poskića tam rybu a mjaso z klóšterskich hatow a lěšow, ale tež hodowne štomy.